

李文恭公遺集

李文恭公文集卷四目錄

湘陰李星沅石梧著

男

概榛

編次

駢體文

王律清先生六十壽序

湯松亭先生六十壽序

勞母劉太安人七十壽序

賀母陳太夫人六旬晉二壽序

張母支太安人六十壽序

代

聶母康太恭人八十壽序

代

陳雨峯鎮軍秋哨圖詩跋

代

吳瓊仙遺稿跋

請祀康太僕鄉賢祠揭

代

祭唐母王太恭人

代

王律清先生六十壽序

伏以青精飯熟霍山標元甫之都翠柏香深江水繞方  
平之洞數華宗於珠樹多列籍於金仙而况陰德耳鳴  
福緣心積指天上恆春之種善果氤氲殖人間益壽之  
禾情田慈鬱也哉恭惟王公律清先生系出太原世居  
章貢應鹿胎之奇兆證鵠踏於靈根幼卽岐嶷少而穎  
特冬溫夏清奉菽水以承顏仲海季江序萼樓而式好  
爰習儒林之業兼通貨殖之書辭百丈之洪岩香爐峯

遠飛片帆於楚塞蘭澤春多地入長沙師依端木當計  
然之市隱早雷義之錢豪學周官九數之篇晨操算博  
卜晏子一廛之宅夜識金銀造物無私善人是富在恆  
情必且耽孔方之好工阿堵之謀秘李核於王戎訪蹲  
鴟於卓氏而先生視之淡如也心平似秤豈屑錙銖眼  
巨於箕何論齷齪黃鳥聚而仍散青蚨去以旋來慕馮  
謹折券之操敦魯肅指囷之節西江可乞忍涸轍於枯  
魚東郭相逢願分枝於窮鳥鮑叔以賈稱潁上季布之

諾聞關中由是排難解紛卹災救患掬讓水廉泉而河  
潤施義漿仁粟以風噓脫絺袍以贈故人饋簞食以蘇  
餓者闢真詮於相法勿爽毫釐啟奧籥於堪輿先培心  
地結檀越而星名象刹普津梁而秋度虹橋志慷慨以  
好施體春容而持正雖古之義方守直康伯名高不是  
過也至若蘭齋花影朝朝懸榻以延竹屋書聲歲歲傳  
經有客比清寒於扃載等措大之生涯儻遇錢神將嘲  
乞相先生禮賢若渴重士踰山喻附近於朱藍慎交遊

於赤黑十旌爲東四簋必隆厚酬皇甫之縑徧置鄭莊  
之驛孔文舉尊開北海談藝雲飛庾元圭讌集南樓冲  
襟月朗洵古歡之夙締尤今世之所希自逾大衍之期  
雅愛空同之對許穆岩阿性癖結想三華向長婚嫁初  
完游思五嶽覺黃梁於支枕餐碧柰以充廚紫樞之窶  
千重丹竈之功百煉捐盧敖而把臂道德函開招曼倩  
以隨肩靈章秘顯所以茅龍齒齟單豹瞳方有桂父之  
鍊形本壺公之聚氣同悟轉輪於石火獨參妙契於煙

霞蓋自室有孟光眉齊鴻案老偕鮑姥手挽鹿車惟內  
助之相資斯外緣之漸少長君服義方之訓選俊黌宮  
中郎賦英異之材績書家塾快壻偕占夫射雀諸孫預  
兆於摩麟五色迴翔篆吉祥之寶字一仁布濩蒸馘穀  
以熙春賓從羨爲德門宦侶式爲福宇今者子躔月建  
甲算年周花放梅梢綻瓊蕊於四照陽回黍谷添繡綬  
於五紋愛日舒長采雲粲爛萃象輦魚軒之彥慶溢瑤  
池並



龍章鳳詔之頒喜盈釵璫星沆誼均子舍分列賓階側  
聞警欬於升堂久挹丰儀於接座泛湘波而酌醴碧湧  
觥罍展嶽黛以濡翰綠環屏幃製月殿霓裳之曲贊金  
繩玉版之文採神芝於十二赤城獻火棗於三千貝闕  
從此籌增澥屋數必晉夫九齡允宜宴啟琳房圖更陳  
爲百壽

湯松亭先生六十壽序

伏以少微四星齡采翊文昌之府浮邱千級紺霞啟衡  
嶽之標則有心撰靈光耳鳴陰德載福輿而斟醴醪和  
飫春膏挹知水以種芝蘭香升天闕如我湯公松亭先  
生者奇兆鹿胎秀分鶴嶺喬柯仰其節概秋渚淡其風  
神當日手握元珠夢操古錦枕秘則瑯環徧厯八代雲  
披摘詞則河漢倒垂萬言泉湧丁甲交馳於腕下斗奎  
羅列於胸前人以爲少作崢嶸獨雄文陣名場轆轤直

上强台矣而先生愛日方殷怡雲自得青紫如芥白華  
在陬長懷戲綵之歡早任析薪之荷南圖北奮家事猶  
羈秋穫春耕田居親課篤孝弟以承堂構積詩書以比  
坻京廉泉讓水之間風薰三古順里敬村之化澤逮百  
年古之人如康成通德彥方端直何多讓焉先是所居  
湖垵相錯鄰壘大波瀾而小波淪水門洄注內隄强而  
外隄弱石限參差將高屋建瓴則彼爲澤國將中流砥  
柱則此亦潘陂久爲訟源儼成勁敵先生乃擘疏地利

規畫星池仿陳登鑿溉之方用王景圩流之法茨防竹  
樁旁開別徑於羊腸葦緝茭舉頓拓支渠於龍首千金  
鼎諾三載庀工極櫛風沐雨之勞分厓樹板通縱浦橫  
塘之別異口同源迄於今雀鼠無爭魚稻繁衍翼翼如  
也益陽夙多水患而辛卯尤亟時則荆門龍門萬壑雷  
奔羅國蛟飛重湖水立導資江而無岸撞東澧而有聲  
村落蛙沈坊庸麋擾縣官議平糴議煮賑皆固請先生  
董事於是左餐右粥露覆飢烏白叟黃童春回野葦守

望而萑苻息警鉤稽而龠合均施蓋先生室廬亦在洪  
波巨浸中而不暇自計也許靖之推仁恕與九族共飢  
寒蘇瓌之策保安俾千室得存活溯茲敦行媿厥前徽  
宜乎泰山釀雲膚寸出爲霖雨荆石剖玉光氣上爲日  
星片甲分耀於虬鱗一枝揚芬於蟾魄海秋以金壁之  
品發山海之藏以龍虎之才際風雲之會精驚八極氣  
凌九霄聯步以陟春官簪毫而襄樞院文章命達當世  
榮之然當鯉對晨趨蜃膏夜炳奉青箱而黽勉擲采筆

以蜚騰則固庭訓淵源楹書授受一字必衷諸古一藝  
必立之程今雖接武夔皋並肩鴛鴦猶復褫躬示範報  
國垂箴溫樹戒以不言亮節期於匪懈夫乃知海秋今  
日之學識與異日之功名皆先生之教爲之也又况驥  
子鑣連麟孫角起瑤環瑜珥寶聚五光繡祿錦綳花明  
十色善餘慶而瓜綿瓞系瑞紛呈而芝萼芸生亶乎人  
貌而天太和表裏者與星沅往客京華曾陪杖履側聞  
高誼遠奉球鍾居茲周甲之期敬上生申之頌緋桃三

月在天酒以染宮袍翠竹千竿繞雲廊而鳴仙樂象輦  
下黎收之拜百壽繪以全圖

鸞音錫重與之文

九陞稱爲老福

勞母劉太安人七十壽序

勞君辛階將以今年四月吉日爲慈闈稱壽於是上方  
載錦中使傳羹披蜀襪之袍戲萊衣而五色撤金蓮之  
燭照韋幔以雙輝星沆謹拜手稽首而言曰福者備也  
備百順而豐總洊臻壽者酬也酬四德而坤褫舄奔粵  
自翠嬀元扈名肇提蜚畫翟銀魚榮班冠紱柳仲郢位  
高九列九記和熊陶土行功在八州書畱封鮓以今方  
古彤管齊椒恭惟年伯母劉太安人系出青藜慧鍾丹



麗月寫珩璜之韻婉婉其儀風揚筐筥之芬蘋蘩載采  
始相莊於鴻案爰共挽夫鹿車靜好瑟琴註房中之樂  
府潔齊棗栗博堂上之歡顏一門衿佩夫柔嘉九族規  
撫其悃慇迨我年伯立亭封翁耕硯爲田囊書入幕紅  
蓮淥水鴛鴦回旋白舫青簾燕鴻來去顧縫衣而密密  
攬別袂以依依天近心遙雲飛目駐太安人則蘭馨戒  
養護樹忘憂奉鳩杖以扶持進蠶繅而紉綴丹砂玉札  
延年儲藥裹之珍夏清冬溫愛日極華顛之樂故封翁

老客諸侯三十載而親舍歡娛無間也至若男錢女布  
綜畫星明魚媵鴉孃惠施春盎念情親之姊姒歎子影  
於嫋嫋竹屋銅盤召諸郎而會食蘭缸鐵沓炳列舍以  
橫經織機戒中斷之絲脫瑱易先生之饌古云鍾禮郝  
法此之謂矣所以善心爲窮髦垂歡喜之雲嘉應如桴  
象裊吉祥之字龍文麟趾子舍芳騰瑜珥瑤環孫枝秀  
茁侍食則香芹采進問安則玉筍班聯而辛陔標幟白  
眉倚裳青瑣蕊宮一曲丰儀競說華年雲海三山仙籍

榮排香案捧朱輪而側帽歸紫禁以懷櫻象笏盈牀鸞  
書積軸揆之崔邠導樂荀母從官其榮寵無以過也星  
沅以年家子而誼切歐韓非公輔才而游如房杜蚤肅  
登堂之拜飫聞宜服之休珥綵筆於西清幸聯蘭譜迓  
板輿於南國願接芳鄰值茲讌啟湘城歡延澥屋輝文  
昌於寶婺張采悅以宮花何當鞠脰希韞進四千里長  
生之酒從此添籌衍算紀八千年度索之春

賀母陳太夫人六旬晉二壽序

伏以雲開太華光盈玉女之盆花種小春采獻金仙之  
悅

九重綸綍鳳翥鸞迴萬疊褒斜珠明繡帟珍禕烏弈珂  
韻鏘鳴雖原冲挹之懷無取鋪張之頌然而下伯符之  
拜誼篤升堂爲士行之賓愛均猶子於以摘華麟管播  
馥麝煤敷廣庇之慈暉奏先聲於隍引禮也維我

誥封安人賀老伯母陳太夫人毓秀潁川揚徽越峴珩

璜式爲雅度蘋藻扇其清芬姆教順從女箴夙稟凡藝  
俎鉶羹之職紹繩紘統之功纖悉不遺柔嘉維則其歸  
封翁靜軒老伯大人也筐筥有齋琴瑟在御黃卷青燈  
之側相敬如賓紅蓮淥水之餘承歡自任卽旨甘而養  
志善宛轉以怡顏當茲娣姒成行衿纓遞侍越羅楚練  
纂組合號鉞神雁雁鳬漪羹湯獨諳食性佩左悅右觴  
而進定省晨昏儲丹砂赤箭之珍料量藥裹高堂倚之  
如子諸婦奉以爲師竹母花姑望中閨而斂手鴉鬟龍

媼聆內則以傾心迨我太伯母嚴太安人以耦庚方伯  
迎養之任遂屬以家事焉維時蘭綺芝楣門高甲第男  
錢女布族聚丁繁出納則易漏卮準酌則難平秤惟安  
人手持全局心理婪絲黽勉醪鹽寬給彤門之稅調停  
旱澇平輸安邑之租戚郤被其風薰鄰里分夫河潤念  
丹雘之舊罔不通其有無卹蒼鵠之微未聞加以辭色  
一門之內雍雍如也然猶有難焉者蓋自封翁以詩禮  
名儒爲諸侯上客書倉無粟硯田不春一旦匱鏡先飛

磨筭欲碎黃鵠之歌千古杜鵑之語三更安人則倚竹  
忘寒折筇示苦環諸孤而隕涕撫弱息以將雛髮影星  
沈篝火淒涼之夕書聲月落紡磚蕭瑟之秋斷齋而粥  
飯經營畫荻則蒲編授受典釵作贅截髮畱賓固未嘗  
一語及貧也宜乎仁心布濩慶輯寅階善氣氤氲穀貽  
子舍哲嗣虎師明府銀河沆筆錦段抒詞紹翰苑之家  
聲蜚英名於廩餼品齊圭璧望仁神仙甫飛舄於關中  
卽捧輪於湖上問安清夜長懷戒石數言潔養白華但

飲廉泉一勺安人慈顏旣展諄誨益殷指天外之三峯  
勉崇亮節徧人間之萬口願聽循聲顧封鮒之書存聞  
活人而色喜興歌載道飭牘常稀推愛子之誠以愛民  
本厲學之勤以厲仕所以樹慈惠之長奉母訓爲官方  
聯和樂之詩紀

國恩爲家慶仲嗣旣擧芳文囿季郎亦分隊名場壻快  
乘龍紫府丹臺之彥孫嬉蠟鳳瑤環瑜珥之資斯誠諸  
福備臻嘉祥總至延齡未艾種德無涯也已今者宴啟



琴堂籌添海屋萃同官而鞠脰賡益壽於護闌仰北棧  
之天高輝騰寶婺對西池而日永果熟蟠桃拜文宣以  
紗幔傳經佐法曲而瑯璈奏雅咸識六珈粲爛酒載酌  
夫千觥更宜八座起居

誥重頒夫

雙闕式宣洪燄允介長生是爲序

張母支太安人六十壽序

代

伏以雲護華髮五色照鳴珂之第香霏蜀襖三春披舞綵之衣乃申青鳥以銜綦綌爰列斑龍而振耀桃實連緋夫琳宇萱花吐萼乎金閨調鳳律於諸天神仙按拍進鑾坡之法酒宮禁傳觴豈非福與慧全緣隨性善表碧薤丹芙之真籍崇翬章象服之懿音者哉維我支太安人系出尹邢門齊鍾郝甲宅則芝田十頃辛楣則蘭綺重栢絲枲組紉幼儀嫻夫姆教衿纓鞶褰內則著爲女

箴清修扇筐篋之芬詩揚蘋藻端雅協珩璜之度禮備  
棋榛年十七于歸封翁健齋太先生時則坐擁皋比庭  
開鱣集鄭廣文之官冷苜蓿秋肥韓國子之功勤膏油  
夜永太安人鹿車對挽鴻案相莊樂府奏於房中甘旨  
承於堂上鴛迴繡帙緣分書帶之春魚躍冰池白奉銀  
絲之膾蓋自越羅楚練巧合鍼神兼之雁臠鳧滌味勻  
食譜花姑竹母盡服其均平龍媪鴉鬟羣推其敏慎佐  
指囷之推解九族風和相秉鐸以薰陶一門雨潤撫瑯

蕾於並蒂種玉樹以連枝慈惠交孚柔嘉維則林下之  
徽劭矣刑于之化翕然夫何寶鏡先飛磨筭欲碎黃鵠  
之歌一闕杜鵑之語三更太安人茹蘖含辛折蘂示苦  
星沈燈影添篝火以橫經月落書聲倚紡磚而課讀書  
荻則蒲編指授斷齏而粥飯摒擋最負笈於名山典釵  
作贊勉遷喬於伐木截髮畱賓于是儀廡蜚英鄩邠比  
駕墨瀋騰乎藝藪穎秀擢于文園長君曉瞻太史赤幟  
高騫紅綾首宴入蓬山而簪筆宮錦剪榮望梓里以旋

三  
三  
三  
鑣板輿迎養視膳而櫻頰

御苑問安而燭撤金蓮天上春官半植門牆之桃李雲  
中紫極再膺殿陛之絲綸人以爲封鮓之貽謀和熊之  
美報矣然猶尊不忘恭貴而能儉太史偶一拜賜則詔  
以知遇之優隆偶一掄才則諭以科名之慎重惜物力  
以養福陳載籍以敦行噢咻而臧獲懷恩調恤而戚閭  
普惠所以善心充益蔚成戩穀之宜佳氣因暵篆出吉  
祥之字仲嗣旣明經上貢雁序翺霄諸孫亦侍寢含飴

犀媒捧月他若乘龍之快婿悉徵射雀之奇資斯誠諸  
第備臻嘉休總至鴻羨烏德門之慶燕喜賡壽母之文  
也已今者澥屋增籌綺筵周甲承鳳誥龍書之錫笏滿  
匡床萃鹿車象輦之英卮盈釗砌某等同居子舍久式  
女宗景采悅於萱闈獻帑韞於鞠脰挹金臺之翠黛歡  
喜雲聯結閨苑之仙葩長生果熟屏環火齊絳帷啟而  
霞明簾卷水精蒼佩鏘而風韻咸識六珈燦爛樂載頌  
乎千齡允宜入座起居圖更呈爲百壽

聶母康太恭人八十壽序

代

蓋聞南嶽靈鍾七二峯位尊天姥西池果熟八千秋數  
紀金仙試研蓮葉之華載劈松紋之紙舒麟筆而圖披  
丹闕進麝麝而藻繪朱邱元都稱益壽之觴宮衣綵繡  
紫府晉長生之樂歌琯瓏玲瞻象服於六珈用飾山河  
而增色仰翟禕於三髻允偕紉縵以流輝維我太師母  
聶母康太恭人者畫雉名門插貂貴冑脂田粉碓舊傳  
吉水之宗鐵巷銅街近識合江之里襟佩鏘而瓊琚式

韻聲絲結而組織稱神維內則之夙嫺遂于飛之始詠  
思樂而懷芹藻秀采鸞旂有齊以奉繁蘋徽流鴻案瑟  
琴宜其雅調筐筥發其清芬玉堂誌勉乎新聯朱蜜承  
歡乎中饋當此晨羞夕膳變理羹湯左輓右觴調停藥  
裏折釧而炊溫薪桂縲車而轡軋機絲辛苦將雛哺嬌  
啼於子夜經營總角縫韋帶於丁年其時藻庭太老夫  
子刷羽鵬搏潛心鯉對績爨柴之學不問米鹽讀漂麥  
之書遑云雞鶩費序之名益重閭房之助良多迺貢成



均旋膺鄉薦桂攀枝而馥郁柳彈汁而恫惺唱苹鹿之  
先聲階庭鳳翥聽喬鶯而志喜

殿陛鵷聯夫其坤德聿修閭儀克協贊一經而刻勵授  
七葉以專門仙禁傳臚西籍占黿頭之選春官列爵戊  
科陪豹尾之班迨我蓉峯夫子鈴院倚裳鑾坡比翼西  
園翰墨宛隨花萼之樓東壁圖書半屬梧桐之第簪纓  
影夫累轂袍笏燦其重茵在恆情必且夸舞綵之榮侈  
登科之記而太恭人處之泊如也一官晝冷猶陳苜蓿

之盤二月春濃預備棗饅之祀蓋太老夫子宦益譚經  
之日正蓉峯夫子試黔歸省之年銜綸綽於彤墀星期  
刻日收珊瑚於鐵網寶氣干霄以槐市之興居效蘭陔  
之眷戀雖廉泉讓水聊供甘旨之需而孟母班姑尤切  
義方之訓卽至黃盤雕錦疊拜

螭坳翠帶香羅屢頒

鳳閣載

恩光於篋笥供衣被於萱闈太恭人亦惟念

君賜之崇高珍之什襲勉臣工之報稱視此元纁洵可  
謂受寵不驚履豐若嗇者矣無何太老夫子鶴馭華陽  
蜺驂晉嶠絕輕塵而不返證夙諦以無言太恭人易繡  
而苦代幃以素環諸孤而隕涕指肯構以培基申教忠  
教孝之遺全事君事親之節一堂相戒三載於茲旣而  
蓉峯夫子復有督學西蜀之

命少城百尺持簞節以騶鳴采障五重御板輿而鵠俟  
特致牽衣之請仍畱入蜀之行遣一介以賁函詳千言

而示勗所以緇林啟處坐滿春風冰鑑懸餘朗澄秋月  
有驪頷之照海無魚目之混珠三面網開仁曲施於法  
外五丁峽闢奇盡露於寰中播信禾善米於經畝拾賸  
馥殘香於藝圃排筆陣而霾清灑瀕導詞源而江決岷  
峨蓋至畱犢懷清懸魚表直疏墨池以宏結構澤永鶯  
湖解縹囊以贈儒林惠貽鴻簡凡吾夫子爲水爲衡之  
舉胥太恭人矢公矢慎之箴往者京圃世丈督學皖中  
亦嘗寓書相示今出守嚴州康保黎元振興文教棠陰

小憩不名劉寵之錢聽秀兩岐載頌張堪之政皆一本  
太恭人之媿訓爲兢兢較諸授仲郢之參連九熊卒業  
卻孟仁之官物封鮐遺懲有過之無不及也蓉峯夫子  
自復

命瀛臺掄英畫省課最而先上考書名以列御屏近復  
講幄依光經筵篤眷步履星辰以上迴翔斗柄之區尤  
徵懿德聿垂嘉祥總至赤芾而綏弗祿絳紗以祝文宣  
也已至于棗栗惟馨染盛告潔采伴欽其淑慎煦嫗春

容編戶被其祥和子諒布濩周卹而戚閭普愛撫摩而  
臧獲知恩厚衣食以拯飢寒施藥餌以蘇疾厄此又愷  
悌之性成抑亦休嘉之感應他若王家四玉韓氏八絲  
寵遇極夫郊邢俊造侔夫達迺雖若季江而仲海猶多  
劣虎而優龍孰與騏驎齊驅鵬鳩均一或金門通籍締  
揚鴻鴻之章或寶鐸興賢冠兆蛇鱸之夢或飭廉隅而  
砥礪額煥

宸題或攀貢樹以芬芳首書蕊榜又况孫枝擢雋奕葉

岐嶷奉席瓜縣含飴竹立瑤環瑜珥種菖蘭芽絳羽銀  
錯花勻綺錯文襟亦蟠虬之彥匡牀皆蠟鳳之嬉謂非  
德厚流光穀貽慶遠而能若是哉今者館啟恆春筵鋪  
內景澥屋進八旬之表錦堂羅百壽之尊碧莞黃蒲醉  
流霞於岷圍紫房青宇嚼甜雪於嶸州夏五靈石以啟  
瓊函彈八琅璈以摹琳篆按天上無愁之譜笑粲投壺  
賦人間難老之詩權盈鞠脆某等情親丙舍迹阻庚邛  
願登軒楨以黎收敬借研箋而獻祝躔長沙于珠絡婺

宿森芒注元液於瓶罍蒸湘酌醴佐法曲於金和玉節  
摘商華而露湛星明從茲

帝錫修齡合證菩提之寶樹咸識日升洪算永依黻佩  
之慈雲



陳雨峯鎮軍秋哨圖詩跋代

雨峯將軍鳳嶺按部虎韜練兵以募收之司辰循苗砦  
而勸俗時則沙兜煙紫盤喇天黃振旆臘耳之門弭蓋  
錫皮之堡夕陽如燒鞭絲颺以霜飛冷風欲鳴鼓角吹  
而雷動千隊之貔貅屏息三尊之鵝鵲聯翩固已憲度  
戎行盧牟疆圉矣至於鴟音鳩舌解誦詩書龍洞魚坡  
歡騰刈穫服斑文於裸壤薰牙旂以稻香黃收徧隴之  
雲鏹腰剽兇黑壓殘礪之樹椎髻盤鴉駸駸乎禮讓之

邦皞皞乎太平之象尤所難焉誰之力也夫國家教澤  
涵濡歲月以深其效而斯宇土風獫狁信義以牖其明  
將軍宣布聖謨洞啟誠腑馴師豹爲徒隸拓菁棘爲莊  
衢碧草赤蘭有望風之偃白巖鳥引無跳月之邪五載  
於茲萬口同悅演陳圖於四奇四正申約法於八鎮八  
安惟敦詩說禮之餘視民苴無畛域故發聾啟瞶之至  
視僕射猶父兄擁節湘城綏邊是亟揚旂秋哨並轡何  
時偶展畫圖附題儷語庶幾懸諸巢父墓崗花狔鳥之

情譜以蠻歌入銅鼓蘆笙之唱

吳瓊仙遺稿跋

右詩賦駢體文一帙亡友吳子瓊仙作也憶予與瓊仙  
交始嘉慶丙子歲維時少年角逐青霞氣雄對宇衡棲  
綠楊春近軒袂文史之側倚裳瀟晦之辰往往古硯磨  
秋殘鐙照雨胡餅一器濁醪半壺喝明月使倒行剗君  
山爲平地長夜罵鬼齋鐘不鳴奇句問天呵壁誰語予  
善嘯瓊仙善哭凡三四年過從無虛日也迨己卯以後  
各被饑驅蹤跡稍稍疏矣然而峽雲嶺樹紙上淒清關

塞屋梁夢中嗚咽黃鶯千里抱隻影於他鄉紅豆幾枝  
種相思於南國路遠而精爽如結會稀而乍見無言雖  
爲參與商偶爾出入而以膠投漆誰能別離蓋瓊仙於  
朋輩行予交獨久亦知之獨深也夫其侘傺於中齟齬  
所遇量愁以億萬千斛扶病於三百六旬白眼傲睨欲  
殺欲割青衫掩泣如怨如癡水則蛟龍蹴波陸則虎豹  
拏攫晝則含沙射景夜則罔兩匿魂時數之奇罕有儷  
者重以家難忧心殷恨次骨馮敬通之坎壈徐文長之

佯狂藥曰繩牀僧寮耐冷蠶絲蠟淚綺語橫陳坐六張  
五角以纏身借醉酒婦人而祈死人非金石何以堪茲  
予數寬譬焉而瓊仙不顧也於禱已矣所爲詩文不自  
收拾時或蘭芷升香椒櫨未翦蛟螭對舞虹蜺與偕至  
其意匠旁皇思徑俶詭鑿險金牛之道繩幽珠蠅之淵  
洵足張楚孤軍建漢赤幟開府之花濃雪聚昌谷之石  
破天驚不是過已悲夫瓊仙生前心血身後子孫賸馥  
零星幾人同調荒原宿草兩度清明日薄冰寒鄰笛山

陽之賦風流雨歇牙琴海上之音每展讀未終不禁涕  
之洸瀾也

請祀康太僕鄉賢祠揭代

竊惟明禋之報千秋法施於民則祀聖哲之傳弈禩維  
桑與梓必恭景先達於幾由旬立太上之三不朽柳仲  
郢位更九鎮家法貽徽范希文功在八州義莊飫德山  
斗允推夫邦族雲疊合薦於膠庠伏見本邑已故原任  
江南河道總督

予告太僕寺少卿加三品卿銜康基田華胄誕靈茗春  
啟秀孕井參於畫野采耀汾原跼衡霍以抒奇聲翔晉



嶠爰以甲科之選蔚爲申甫之才製錦雷封鶴市欽其  
 廉正移麾電燭羊城凜若神明迨宏河內以遠謨遂綜  
 海東而敷厯三遷特簡八座興居香花之供氤氲甘棠  
 之港絡繹以天下爲己任暘雨羹梅如保赤而誠求水  
 火衽席其惠政則難更僕數其鴻伐則可約略陳溯自  
 鹽筴度支漏天石補墟榛翦剔寒谷春回釋芻茭於南  
 突東囂蘇餓殍以左餐右粥廣文翁之行縣洞啟精廬  
 積段直之藏書瑩開雅館蓋美俗使者口碑交頌以三

公而水利圖經脈絡尤通夫九曲鯉渚防而重樓聳峙  
龍江導而千澮渠彌雉堞幾危瓠歌皓旰蛇盤宛迹稻  
浸漉池王尊叱水於金隄河公獻策殷肅引陂於石閘  
天海分甘陽侯戢浪以扶持星使臨流而諮譚五十載  
風雲慶會砥柱迴瀾十二篇禹貢纂元  
溫綸倚畀臣心如水

帝鑒在茲且夫體立者用行事業端在性功之表根楸  
者實遂忠臣必於孝子之門故植品莫先五倫而推恩

足保四海原其宅衷豈弟賦稟子良祭不逮存墮瀧岡  
之老淚敬以將愛舞萊子之斑衣數平反大獄以悅慈  
顏活億萬生靈而延母福至於蕭齋畫粥少日多艱姜  
被聯床中宵耐冷薄宦讓西頭之屋誼篤士龍孤舟歸  
季子之喪神淒斷雁官舍以銅盤會食階庭之玉樹成  
行孝友於家是亦爲政施濟能衆何止於仁或陸氏莊  
營感名場之知己或千鈞髮引續焚戶以零丁或昭品  
藻於牽絲或掖俊髦於連彙或居大不易贈米長安或

賓至如歸暨茨公室凡此善懷之充益孰非治行所蘊  
函以是翼贊

兩朝參軌四佐丰標謇諤晚節餘香

主眷優崇成勞永念秋宴婆娑乎白髮老臣終始以丹  
心太常之紀六功旂旂彪炳君子之澤五世閭閻羶薌  
迄今清德樓高勲賢里舊覩張相鳴珂之第碩望依然  
登魏公畫錦之堂私榮何敢腹詠心歌者半宇內耳濡  
目染者徧國中彼蔽芾覃懷例奉漢家都尉豈枌榆耆

艾尊遲魯殿靈光太史氏秉筆以書績斯偉矣鄉先生  
沒祭於社禮亦宜之洪惟

聖代旌賢嘉儒林丈人之選敢附公評著燉進太平官  
府之型合遵功令以臚言請附上儀而享祀庶幾高山  
喬木卽車服禮器以低回遺韻流風如日月星辰之瞻  
仰

祭唐母王太恭人文代

嗚呼紺采霜飛北第抱萱花之痛碧流春杳南湘悽斑  
竹之詞況詹畫像於甘泉母儀是式而悼禮宗於慈蔭  
戚邨何依惟我太姻母唐母王太恭人者春江韞毓秋  
水精神嫺內則於名閨協相莊於嘉耦陔華潔白芝膳  
流馨燈火然青芸窗伴影固已珩璜其度婉婉其躬矣  
夫何玉樹生埋寶笄中折杜鵑啼血酸落日以繁音寡  
鵲將雛慘孤兒於遺腹亡著簪而不見坐蓐室以無言

太恭人經以持紉髮而就蓐麻衣如雪蘭芽瑟瑟之秋  
乳淚交流苦枕呱呱之泣天平不弔命也如何於是攬  
蕙含哀茹荼耐苦晬盤保抱施雀飯以禳災總角摩沙  
授熊丸而課讀鄭絛秦篝之側宛轉書聲男錢女布之  
先殷勤荻畫遂使零丁黽勉秀出班行片甲蜚騰光生  
世胄哲嗣育庵農部以拔萃掇高科主司徒爲清秩宮  
袍在笥五色承歡綽楔表閭

九重旌節拜

絲綸之稠疊集冠佩於孫曾信食報於其身而種福自  
無量也上月爲太恭人七旬壽育庵將乞假歸獻金母  
之尊效萊子之戲鋪陳家慶報答春暉乃燕市低徊方  
盼娥阿月朗而鸞駢縹緲忽驚織室星沈丹砂之續命  
無靈畫閣之含飴不再一門天老九族風枯龍媪鴉孃  
銜恩涕泗魚丁雁戶戴德欬歔宜育庵襍被奔馳瞻廬  
擗踊奉殘機而何恃探宿桶以長號也已某孫策登堂  
茅容共飯絳紗數拜託子舍之昏姻彤管爭書熟辛劬



之往事將晉羽觴於眉壽倏攀瑤馭以心摧敬上東芻  
悲深歌薤三千界靈旂宛爾神還兜率之宮六十年列  
爵巍然淚墮瀧岡之表

李文恭公文集卷五目錄

湘陰李星沅石梧著

男

櫟 揆

編次

滇南軍書

蔭興堂提軍

蔭興堂提軍

蔭興堂提軍

蔭興堂提軍

蔭興堂提軍

蔭興堂提軍

蔭興堂提軍

李子廉鎮軍黃惺溪觀察

李子廉鎮軍黃惺溪觀察

黃惺溪觀察

黃惺溪觀察

蔭興堂提軍

普安園廉訪

寶篋谷太守

寶篋谷太守

黃惺溪觀察

蔭興堂提軍

普安園廉訪

普安園廉訪

蔭興堂提軍

蔭興堂提軍

丙午十一月初九日

查前據順甯文武節次稟稱大小猛統回民糾集千有餘人在於緬甯城外新寨等處搶擄燒殺勢甚猖獗請卽派員調兵前往救援等語當經陸立夫中丞札委署迤西黃道會同李鎮前往查辦並移知尊處就近相度機宜如一時未能肅清尙煩旌麾親往以資震懾等因在案迄今日久尙未據李鎮稟報起程而順甯府縣疊次稟催均以該鎮並無回信查此次緬甯鬧事是否盡

係回人抑有游匪附和肆行不法律所必誅該鎮聞信之餘自應飛馳前往迅速勦辦或卽驅散以靖地方似此觀望諉延殊屬有辜職守沅甫經蒞任尙未能熟悉情形且相距較遙難於懸揣務祈速飭李鎮選帶弁兵兼程前往認真勦辦並於各要隘堵截以防竄擾毋使蔓延現聞雲州亦有屯聚匪徒二百餘人稱係公浪回民是否緬甯散歸抑由他處糾往均祈督飭確查妥辦萬不可任其泄視如該鎮不能得力卽希大旆親臨總

期早就救平以杜後患否則曠日持久貽誤因循責有攸歸沅斷不敢稍存回護也竚望德音以紓懸系

又十一月十三日

再承另示緬甯回務沅於初九一函業已縷陳清聽此舉利在速了久恐勾結蔓延且以烏合之徒意存敲磬非兵威懲創必不知畏知感後患終無已時沅甫經抵滇又兼撫篆省城根本重地相距較遠勢難遙制邊情所有台旆行止俟黃署道確信卽由大才酌定務協機

宜至騰越李鎮久未起程會勦沅以事關重大不敢不據以入奏除抄摺咨行外仍祈迅飭前往刻期辦竣沅亦不肯爲已甚也

再查此次前後所調各營官兵及貴標隨營兵數並維西土練左守備土練約計已將四千名聞緬匪不過千餘人如果我兵到齊奮勇敢前似亦可供策遣至昭通鶴麗等兵程途太遠徒稽時日兵在精不在多高明自有勝算也



又十一月十四日

頃接本月初九日專弁賁來手書備荷藻飾感紉無已  
承示緬甯匪徒滋擾業經大旆親臨督辦具見公忠勇  
敢籌畫周詳實深欽佩查該匪等藉口滋事衅非一日  
雖經各前院疊次查辦無如愍不畏法猖獗如前此次  
相持日久糾聚日多緬甯甚爲可慮若不實力懲創何  
以上紓

聖注下拯民生今得閣下整我師旅兼程前進自當立

解倒懸惟緬甯與順甯一帶隘口四路可通必得酌派官兵逐層圍堵使彼內無可食外無可援乃不戰而自困且免此拏彼竄冀淨根株業經飛飭該管文武分途堵禦無使滋蔓仍希就近相度形勢飭令周密掩捕以期迅速藏事至滇省界連外域漢夷雜處匪徒乘機劫搶勢所難免亟應嚴行拏究庶可行旅相安現在永平公浪等匪曾否解散已飛札永昌府協嚴查尙祈隨時示悉稍慰懸系

又十一月十六日

本月十四日曾具一檄頃接迤西鎮道合稟該匪等燒殺搶奪緬甯村寨爲之一空甚至將雲州處決重囚二名搶劫逃逸目無法紀至此已極必得厚集兵力痛加勦辦庶可以靖邊圉現在該鎮道已行抵該處惟兵力較單一時恐難得手沅已查照來稟飛札飭調普洱鎮兵五百名新習營兵三百名威遠營兵二百名令曾經出師之將官管帶星飛馳往以資調遣計此時台旆帶

兵業已早發務須迅抵該處指示機宜或併力合攻或分途策應以符奏案并飛催原調弁兵迅由緬甯後路抄入以資夾擊其交界各處嚴密防堵最爲目前要著前經沅札飭各屬文武在於緊要隘口層層堵禦仍祈就近相度地勢札飭各營分布防禦嚴行盤詰以免竄擾禱切禱切

又十一月十七日

十七日專弁持回復書并另件備悉一切快諭蜺旌於

十四日啓行計期迅抵順城督飭進剿或分途抄截或併力合攻想洞悉機宜自有得心應手之妙慰甚企甚承示加調臨沅元江新習共兵千名亦當加札酌辦惟俟各路兵齊曠日持久深慮匪黨滋蔓若昭通劉鎮相距更遠誠恐緩不濟急現由沅就近派委果副將前來聽候左右撥用尙有愛副將一員亦擬俟其過省時酌令續往管帶似不乏人也其紅岩彌渡蒙化等處止可就近派撥防堵步步爲營遠來則疲於奔命矣至緬甯

匪黨嘯聚自須前後夾擊乃可迎刃而解若雲州劫囚之犯據署牧來稟似未屯集州城所云挖濠築寨就令實有其事恐亦本地回民自守之計未必卽爲外匪抗拒情形祈再飭確探爲要又緬甯近事單內有十九日夷練與張富兩下交鋒一語殊滋疑竇豈張富已有反覆耶亦望查實見示兵家重在偵探千萬的確要緊至醜類誅不勝誅此時必加懲創以挫兇燄或訪出首從各犯的名卽四處分貼賞格有能設法擒送者予銀若

千雖未必卽有應者而要犯與游匪未始不兩相猜疑似亦用間之法廉訪略爲清理卽令赴順不過資以共商至如何相機克敵調度籌防迅速了事要惟閣下是賴鎮道亦必同心相濟也土練可用左大雄土練更可用但肯加倍出力亦必加倍賞之事在緊急豈暇顧惜小費耶回類雖繁總宜處以鎮靜遙惟鴻才布置令反側皆安不肯治絲而棼也密咨一件千萬祕慎勿宣又李登魁陳章二員熟悉營務似應留標照料以免兼顧

統祈酌之

又十一月二十一日

本月二十一日接十八日自蒙化移來手翰備悉壹是查該匪等雖經屢次撫馭無如狡黠成性反覆靡常不能不痛加懲創惟聞緬甯道阻文報稽遲亟應遣役偵探實情并設法疏通或旁探小路始可擇要進剿否則兩地懸揣必滋貽誤如另箋所云裹脇之說似以仇敵爲同袍恐以告者過也其普洱等鎮營官兵前經查照



飛札飭調大約不日可到迤西迤南官兵旣回寨甚  
多均應駐守彈壓未便再調卽祈就近迅調各夷練以  
佐兵力之不逮此間論邊務者皆云兵不如練民練不  
如夷練未必可信但以兵費賞之使之助我兵威其耐  
苦敢戰誠匪徒所望而生畏者事當先其所急想早籌  
畫及之幸勿再任鎮將游移致賊黨愈積愈多也目今  
順郡經費孔亟昨接署西道黃守來稟已飛檄永昌蒙  
化兩處趕緊運錢接濟因蒙化回寨最多誠恐勾結四

出沅業經出示曉諭並調楚雄協兵三百名前往防堵  
其神舟渡等處亦經派撥臨沅鎮兵四百名堵禦並聽  
候閣下隨時調遣矣

又十一月二十六日

正盼捷音適接二十日自西牛街發來復書知台旌尙  
未抵順而鎮道十三四日兩次所發之兵又在把邊關  
駐紮尙未前進殊深焦灼雲州匪徒如何聚衆抗拒現  
無實在情形我兵自應徑趨緬甯先攻首惡設雲匪竟

敢動作一面轉戰直前打通道路一面從順甯飛移重  
兵前後夾擊使彼腹背受敵方爲正辦乃李鎮僅據風  
聞匪黨日多遂令弁兵徘徊中路試問把邊關偪近雲  
州豈我兵久駐之所且不慮雲匪藉口以爲我兵自往  
尋衅耶若牛街里民呈詞未必無因止應如示差探確  
實密速酌辦仍當外加鎮靜切忌驚疑其蒙化各口要  
隘沅已飭調楚雄兵三百名迅往防堵此時如加調重  
兵先駐縣城竊恐無故自擾又生荆棘爲今之計總以

緬甯爲急務緬甯圍解他處自望風斂跡若四路徵調  
不務進勦勢必曠日持久賊黨益多從何收拾且李鎮  
坐擁重兵置危城於不顧軍令具在其能當此重咎耶  
川省咽喉匪不靖偏近迤東昭通所轄一百二十里皆川  
匪出沒之地屢經嚴飭劉鎮親往分途堵截自難分身  
來西昨已飭催果副將往供驅策頃又派愛參將馳往  
會同呂遊擊管帶普洱威遠等營官兵從緬甯後路進  
發以備兩路夾擊現當軍門親莅鎮將亦不乏人必能

相度機宜痛加懲創無令鉅將遷延以期安速蕲事臬  
司卽赴大理籌辦糧餉轉輸文臣職在督催不能望其  
披堅執銳也外調兵數目清單祈檢入

李子廉鎮軍黃惺溪觀察 十一月二十三日

二十三日連接十四日發來各函備悉一切所論皆極  
精當全仗卓見不疑約計蔭提軍日內已抵郡城子廉  
總戎卽可帶兵前進雲州聚集之眾是否卽係劫犯匪  
徒其現無動作情形或本地回民畏禍自保亦未可定

官兵所過未必敢於邀截即使中藏叵測順郡之兵亦可前往接應彼亦腹背受敵此時要策惟在設伏出奇尤在鼓勇速戰否則曠日持久經費虛糜且匪類日聚日多勢成滋蔓誰任其咎本地之練不如夷練近聞夷練之外該匪等最懼楚人附近炭廠各山湖廣客民甚夥招而用之或可得力彼匪之肆無忌憚由於曾未喫虧若能大加痛懲必可一戰而定所有各路要隘已密飭文武防堵並酌派楚雄兵三百名駐紮彌渡馬台渡

一帶臨沅兵四百名分駐神舟谷口等處以防該匪竄  
逸隨帶委員不敷差遣前已由省派委夏光煜等正佐  
四員如就近另有可用之人卽由札調不必拘泥至甯  
台汪牧方伯以銅務要緊且聞永平一路不甚安靜該  
員不能赴順自亦實在情形也候補經歷劉祖崑聞於  
順緬一帶尙爲熟悉有言其能任招練等事者擬令馳  
赴左右以備策遣

又十一月二十七日

再承會函及另示節略謹已備悉一誤再誤豈容更誤  
數語實爲卓見定論大要不出於此現在先其所急似  
宜進攻緬甯其逆形顯著罪無可赦誠能腹背夾擊聚  
而殲之餘黨自可膽落應以夷練制勝而以官兵助威  
重賞之下必有勇夫前函及立翁柳翁皆有書寄塵清  
聽想碩畫早爲見及不以惜費游移也至雲匪如何抗  
拒日久未得實情或官兵經過不問密爲準備如敢直  
前邀截卽於順城分遣精兵飛往應援一面打通赴緬



大路擇要拒守使彼兩不相顧或亦化險爲夷之策倘  
止觀望不前徒稽時日坐任賊黨布置周密且各處游  
匪乘機竊發勢更難於兼顧不幾成束手耶前商普洱  
威遠各營兵由緬甯後路進勦頃復添派愛參將馳往  
會同呂遊擊管帶並由臬司札普洱府威遠廳就近調  
派夷練隨往應用果能一鼓作氣兩路合攻何難迎刃  
而解如彭署守謬悠之說迤西豈有廓清時耶雲州已  
另委署臬司卽往大理事機緊要惟在一戰而勝提戎

際不可行

書來亦經縷悉復之祈晤時借閱以供採納佇望捷音  
臨池翹祝

再緬匪滋事日期業經兩次奏報並聲明飛飭鎮將帶  
兵往勦距今將及兩月倘仍未接一仗未翦一賊若爲  
無事者然則所調官兵究在何處所敘逆匪近作何狀  
此次月摺斷不能不附奏而又斷不能著筆萬分焦灼  
至雲州回村謀抗務得實在情形似應明張示諭專拏  
劫囚重犯不問其餘若永平狗街等處匪徒搶掠能否

派兵巡查暫資彈壓俟大處得手再商移兵辦理故緬甯禍首利在痛勦尤在速勦且勦賊宜聚不宜散能逐層圍裹使不外竄我兵併力攻之乃刻期收效耳

黃幄溪觀察

十二月初四日

昨見前月二十四日所發復立翁書藉悉一切兵少固當持重兵多尤戒久延賊匪果聚雲州則緬甯駐兵正可留爲後路待前路進勦即可兩下夾攻賊黨雖合我兵必分不得聚於一處或暗或明或虛或實或設伏邀

擊使彼前後不相顧或譌言離間使彼黨羽不相能如  
回寨有砲眼須用攔牌避之而以火箭火毬自外轟內  
如回匪工伏箐須踞高阜望之而以擡搶擡砲自上擊  
下第一偵探要緊探得確實密行傳令動手又須聲東  
擊西迅速掩捕兵法攻其不備未有待其備而後攻者  
設彼恃險負隅但我兵四面堵截逐層圍裹使之內無  
可食外無可援亦可不戰自困又往來函札須屬提鎮  
諸君千萬閱畢存內斷不可令他人見之走漏消息事

機隨時難以遙制全賴運籌決勝佇報好音劉經歷所  
云是否可行祈酌量差遣爲要再聞雲州回寨有隧道  
繞出象山之後務須偵探確實密伏堵截毋使抄出轉  
爲所困切切

又十二月初六日

初四日密布一函頃接前月二十六日會銜公牘及兩  
荷賜翰備悉一切緬匪逃歸雲州究竟現作何狀有無  
顯肆抗拒實偏處此頗費周章如提軍來函所云先令

交出重囚及商同劫囚各犯實爲扼要辦法前派楊令  
馳往亦經籌畫及此乃該令自順而回太不曉事已嚴  
加申飭復飭迅往雲州確切查探或有端緒就近乞密  
示機宜委員會辦如回寨負固不服則師出有名不至  
又貽口實耳又提軍函稱先攻雲州樂黨然後進攻太  
小猛統豈樂黨已有反側耶心甚訝之鎮康土司來稟  
語氣頗壯得批示剴切儘可藉以有爲果能擒送賊酋  
必不靳優敘重賞行軍用人之道非此不爲功也陳興

史拏獲漢奸較鄉練差強人意然使各處鄉練節節防  
阻雖未爲勁旅賊亦安能來去自如耶蒙化現駐重兵  
并飭孝參將管帶防堵廉車之出亦屬其相機前進所  
需經費米糧屢與薇垣籌畫并札永昌大理隨時接濟  
統望權宜辦理無以專擅爲嫌此舉駕輕就熟惟左右  
是賴外此因人成事豈堪倚爲長城耶多察少發益加  
恢宏之訓謹心藏之并望隨時導我先路也

蔭興堂提軍

十二月初六日

頃接前月二十六日惠函欣知台旆已抵順甯兩路官兵共到三千餘名左大雄土練并維西獐獐練亦計日可到當兵力厚集之時仰藉戎略指揮自可迅就敕定緬匪雖經退散而雲州毗連回寨諸多牽制且無抗拒實跡沅亦早爲籌慮承示先飭交出被劫重犯及起意劫犯各首從實爲此時要著如能擇要圍裹脇以兵威辦理漸能就緒竟可無煩開仗則更妙矣鎮康土司所請我兵果有餘力亦可扼要兼顧旣壯夷目之威且寒



餘匪之膽似爲得計至樂黨本張富巢穴該犯現在何處如公然反覆勢難稍事姑容若止消沮閉藏尙祈濟以權變使彼無所藉口而我有以藉手庶萬全無患也其兵練圍捕勒交軍械一節應是收場文字此時尙難驟辦又加調維西兵三百名暫駐蒙化防堵卽當如示札飭但此係果副將以爲得力之兵或屆期再聽調用耳外雲州地圖及兵數清摺均收入

普安園廉訪

十二月初六日

昨據鎮道來稟緬甯匪徒因聞官兵將至均經退歸雲  
州回寨且有一股逃入灣甸夷地等語查該匪等屢次  
滋擾反覆靡常若不痛加懲創爲害無已卽雲州劫囚  
一案係奉

旨勾決重犯亦何能任其遠颺現在所調各路官兵屈  
計次第雲集沅業已批飭該鎮道上緊奮力相機攻剿  
至蒙化地方扼要現派重兵彈壓如台旌莅榆後察看  
應須前進卽祈就近移駐藉壯聲威亦免他人藉口是

所翹禱

寶篋谷大守 十二月初九日

另箋并地圖領悉此事利在速了總須先操必勝或出奇設伏或間道夾攻雲州患在無形似應速出明示專拏劫囚重犯一面剴切曉諭良回令其各自爲衛俾不至中道梗塞俟緬甯得手即可迎刃而解也或云夷練較得力想已籌商及之

又

頃得初二日惠書知緬匪逃散之由意在我歸彼出且雲州現有聚匪我兵如果進攻則衙署倉監先須保護卽順城附近亦應加意提防而兵砲得手尤在居高臨下虛實相生誠得雲回知畏能將重囚獻出自由長材商辦何忍玉石俱焚從來治匪之法不外解散其黨多樹之敵設伏出奇以攻不備至其備而後攻則非所敢知矣彼在離合之間者來示已見肺肝如何動中機宜萬全無患全仗在事諸君悉心圖之非千餘里外所能

懸揣也夷練居兵之先民練亦兵之助必不可廢能分段堵截處處與賊爲難縱不能稱勁旅賊敢出入自如耶來質之回似無歹意千萬開誠待之不必爲叢毆雀也

黃惺溪觀察 十二月初九日

頃展初二日惠書備悉各夷練光景似芒市土練如果得力卽由鎮軍飭調當無不應但恐緩不濟急卽維西獐獐練甫報前月二十七日起程亦須月望抵營矣現

在酌派已定進兵次第想俱全局通籌慎重出之多一處卽多一處布置矣鎮軍與陳都司左士弁自能勇往直前餘均有伏有應有留守諒彼烏合小醜可尅期殲之也鄉練得簡明示勸已有振作之概將來善後結局不外此法雲州如獻出要犯則兵力有餘又可相機行事總之大處得手餘卽迎刃而解事機間不容髮惟老謀深算動合機宜非他人所能遙制也緬甯兵練必爲後路之用彭牧何故指留實爲憤憤銀餉已飭藩司并

永騰各處徑解順城但須加倍慎重以免疎失所獲漢  
奸數名已於提軍書中商及矣

蔭興堂提軍 十二月初九日

頃得初三日發來翰教兵練現經酌派前後分合接應  
留防布置妥貼此舉定操全勝緬圍已解普威官兵士  
練應再札催抵順備用必不可任其扣留也各民練既  
肯堵截匪徒不敢橫行卽好消息久之當轉弱爲強矣  
雲州赴順回民願留作抵似獻囚邀恩尙非虛誑但恐

良不敵匪力有未逮非兵威鎮懾未必如願以償或再  
准續限一次更爲仁至義盡彼亦無所歸怨想卓見已  
早及之永騰距順較近前飭協撥銀兩應卽令其徑解  
廉訪暫駐大理亦當速其赴蒙所調劍川兵二百名卽  
飛札止之委署已如示照辦矣又密示漢奸一節沅意  
現獲數犯旣據審明探信屬實似可擇其尤重者卽於  
營前請

令正法以昭儆戒否則效尤者多將視爲無關緊要也



普安園廉訪十二月初十日

頃接提鎮函稟官兵指日進攻銀餉由大理轉輸略嫌迂折所過之處亦難放心不如徑解順郡至旌旆移駐蒙化聲氣始可相通一切指麾彈壓均較大理爲便事關軍務沅於奏委摺內聲明前赴要隘分駐卽祈高才酌之時行則行毋滋他人以口實也外錄提戎來函所覽入

又十二月十二日

承示一切自是防於未然第雲順有事之秋必應先其所急前准提軍函稱大理以寬留兵力已資鎮定現在要緊辦法惟當諄飭府縣會營靜密防範并督勸城鄉漢回示以誠信曉以利害一體團練保衛不得無故自擾若復區分黨類草木皆兵則隨處成荆棘矣且蒙化地勢扼要彼處重兵駐守正以防護榆城昨函已經專致祈卽酌度前往以符奏案

蔭興堂提軍 十二月十二日

頃接初六日大咨并承示兵練已於初四日攻燬樂黨

初五日已往雲州勦辦等因查樂黨爲張富巢穴現經

此最要緊

官兵攻燬張富蹤跡究竟如何計酌定進兵次第先攻

樂黨亦必師出有名且雲州回民曾乞交出劫囚各犯

此最要緊

此時能否如約或藉兵威震懾辦理較易得手殊深盼

切如果緬甯逃匪聚集抗拒其罪卽不容誅統希振勵

戎行相機策應奮迅勦辦至各鄉團練誠能合力堵截

該匪等所至輒窮亦可不戰自困祁泰數次出力幸有

以獎勵之其被傷練民亦必查明賙卹是爲至要